



MEMORIA EXPLICATIVA DO CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E A REDE EUROPEA CONTRA A POBREZA (EAPN-GALICIA) PARA O DESENVOLVEMENTO DE ACTUACIÓNS ENCAMIÑADAS Á COORDINACIÓN, OPTIMIZACIÓN DOS RECURSOS E SINERXIAS DE ACTUACIÓN DAS ENTIDADES INTEGRANTES QUE TEÑEN COMO FINALIDADE A LOITA CONTRA A POBREZA E A EXCLUSIÓN SOCIAL NO EXERCICIO 2025

ANTECEDENTES

EAPN-Galicia é unha entidade que agrupa a entidades autonómicas do terceiro sector implicadas na loita contra a pobreza e a exclusión a través da defensa dos dereitos das persoas en situación ou risco de pobreza e exclusión mediante a incidencia política e social. Constituída conforme o artigo 5 da Lei Orgánica 1/2002, do 22 de marzo, reguladora do dereito de asociación, atópase inscrita no Rexistro Único de Entidades Prestadoras de Servizos Sociais co número E-5769. Segundo os seus estatutos, carece de ánimo de lucro; conta con personalidade xurídica propia, autónoma da das súas entidades asociadas, con plena capacidade para ser suxeito de dereitos e obrigas; o seu ámbito de actuación é principalmente a Comunidade Autónoma de Galicia, e ten como fins, entre outros, os seguintes:

- a) Facilitar os fluxos de información entre as organizacións do terceiro sector e contribuír á formación dos seus diversos axentes.
- b) Contribuír a analizar a realidade da pobreza e a exclusión social e reflexionar sobre as súas causas e sobre as propostas para a incidencia das mesmas, promovendo estudos e investigacións, así como xornadas, seminarios e foros de reflexión e análise.
- c) Incidir nas políticas sociais desenvolvidas en Galicia, dende o ámbito europeo e estatal ata o local, con especial incidencia nas políticas deseñadas e executadas pola Xunta de Galicia.
- d) Potenciar a transparencia e mellora da xestión do sector, desenvolvendo unha estratexia de calidade e responsabilidade das organizacións, así como recompilando e transferindo as boas prácticas identificadas.
- e) Facilitar a participación das persoas en risco de pobreza ou exclusión social nas entidades membro e diante das diversas administracións públicas.
- f) Sensibilizar ao conxunto da sociedade e corresponsabilizar aos axentes clave, en particular administracións públicas e empresas, sobre as cuestións relativas á inclusión social a través de diferentes iniciativas, como a responsabilidade social corporativa.

Para conseguir os fins antes mencionados, EAPN-Galicia leva a cabo as seguintes actividades especialmente en tres liñas de actuación:

- 1.- Sistema información compartida e traballo colaborativo e en rede:
 - O desenvolvemento de intranet con repositorio documentación e xestión de comunicación e formación interna.
 - O compartimento de información e boas prácticas con entidades membro e con outras redes autonómicas e coas redes de EAPN estatal e europea.
 - A xestión de voluntariado e de participación de profesionais das entidades membro.
 - A realización de estudos.





- Asegurar o mantemento e a seguridade informática, e a transformación dixital da entidade.
- O fomento do traballo en grupo, ben de xeito continuado (Comunicación, Participación, Inclusión sociolaboral, Inserción socio-residencial, e Fórum de asesoras xurídicas do Terceiro Sector de Acción Social) ou *ad hoc* (Desinstucionalización e novo modelo de coidados das persoas vulnerabilizadas; Lei de diálogo civil de Galicia; Ingreso Mínimo Vital e Renda de Inclusión Social de Galicia (RISGA); propostas para Comités de Seguimento FSE+ e FEDER; Coidado e prevención de riscos psicosociais nas entidades do Terceiro Sector, e outros).

2.- Incremento da capacidade de investigación e propostas de mellora na loita contra a pobreza, exclusión social e servizos sociais:

- A identificación das prioridades en servizos sociais e emprego dende o Terceiro Sector Social galego.
- A realización de informes e propostas en diversas materias sobre pobreza, emprego, xénero, vivenda ou garantía de ingresos e rendas mínimas (Ingreso Mínimo Vital, Renda de Integración Social de Galicia).
- A organización de foros sobre pobreza, exclusión social e Terceiro Sector de Acción Social.
- A resposta ás demandas, consulta e diálogo coas administracións públicas, en especial a Xunta de Galicia e a FEGAMP, así como cos grupos parlamentarios e os compromisos políticos da Lexislatura 2024-2027.
- A elaboración de propostas e achegas ás presentadas nos órganos e foros sociais de interlocución no eido dos servizos sociais e o emprego como o Consello Galego de Benestar Social, o Consello de Economía Social o o Observatorio de Acción Voluntaria, sen que isto implique, en ningún caso, remuneración algunha para a entidade pola súa participación nos mesmos. Tamén a participación nos grupos de traballo da Axenda Social de Galicia.
- A elaboración dunha estratexia de colaboración, xestión do coñecemento e traballo conxunto entre servizos sociais, universidades e Terceiro Sector Social galego, coa creación dun grupo de discusión e foro de diálogo, e dun mapa de iniciativas de colaboración existentes (investigación, formación, voluntariado, aprendizaxe combinado con servizo, e outras) ou dunha consulta de necesidades e demandas de investigación universitaria das entidades.

3.- Aumento da capacidade comunicación interna e externa para difusión da mensaxe de defensa dos dereitos das persoas en situación ou risco de pobreza e exclusión, especialmente a través de:

- O mantemento dun Grupo de comunicación operativo.
- A realización de seminarios, acompañamento, deseño e implantación de campañas de comunicación, tanto a través dos medios de comunicación tradicionais coma os dixitais, en especial as adicadas a combater os prexuízos, estereotipos, intolerancia e ata desprezo ás persoas en risco de pobreza ou exclusión, como instou por unanimidade o Parlamento de Galicia.





- O fomento da participación e presenza efectiva das persoas en risco de pobreza e exclusión en encontros de participación locais, galego e estatal, así como a identificación de boas prácticas de participación social nas entidades do Terceiro Sector Social.
- A celebración do Día da Xustiza Social e do Día de Erradicación da Pobreza.
- O reforzo da comunicación directa con entidades e profesionais a través do boletín externo quincenal EnRedeSocial ou do boletín semanal interno.

Que no exercicio destas competencias considérase axeitado desenvolver unha liña de colaboración coa concesión dunha subvención a través da subscrición dun convenio con EAPN-Galicia, para facer posible o desenvolvemento das actuacións tendentes á coordinación, optimización dos recursos e sinerxias de actuacións das entidades integrantes que teñen como finalidade a loita contra a pobreza e a exclusión social descritas no expoñendo segundo do convenio.

A instrumentación desta axuda por medio dun convenio de colaboración singular reside na circunstancia de que os estatutos de EAPN-Galicia configúranse como a única que ten por obxecto a incidencia no deseño de novas políticas e prácticas que contribúan á defensa dos intereses das persoas en situación de pobreza e exclusión social, provocando cambios que optimicen os procesos de inclusión social en Galicia, e a única na que se establece que poderán ser membros da mesma todas as persoas xurídicas sen ánimo de lucro involucradas na loita contra a pobreza e a exclusión social definida de acordo co establecido no artigo 3.1 da Lei 10/2013, do 27 de novembro, de inclusión social de Galicia. Esta entidade apoia ás entidades representantes das persoas vulnerables que conectan os seus esforzos para conseguir sinerxias e crear unha plataforma que canalice e dea voz ás demandas do sector. De acordo con isto, a Consellería de Política Social e Igualdade considera que a colaboración no mantemento das actuacións descritas nos fins de EAPN-Galicia cumpre, indubidablemente, unha función de interese social en consonancia co establecido no artigo 19.4.c) da Lei 9/2007, do 13 de xuño, de subvencións de Galicia e no artigo 40 do seu regulamento, aprobado polo Decreto 11/2009, do 8 de xaneiro.

XUSTIFICACIÓN E OBXECTIVOS

1. O obxecto do convenio é a colaboración entre a Consellería de Política Social e Igualdade e EAPN-Galicia para a realización, por parte desta última, dunha serie de actuacións encamiñadas á coordinación, optimización dos recursos e sinerxias de actuacións das entidades integrantes que teñen como finalidade a loita contra a pobreza e a exclusión social.
2. A colaboración establecida neste convenio céntrase no financiamento das actividades que aseguren a unión de esforzos, a creación de sinerxias e o incremento da eficacia e a eficiencia das actuacións das súas entidades membro, coas seguintes finalidades, pormenorizadas na cláusula primeira do convenio:





- a) A creación de grupos de traballo, tanto estables como *ad hoc*, establecendo protocolos e calendarios de realización das xuntanzas, con implicación de persoas expertas e das entidades membro.
- b) A garantía dunha presenza e interlocución activa na definición de propostas que melloren as políticas públicas que afectan á redución da pobreza e a exclusión social.
- c) O incremento da participación democrática e a incidencia social e política dos galegos e galegas en risco de pobreza e exclusión social.
- d) Facilitar a comunicación interna e externa e o recoñecemento das organizacións de iniciativa social do Terceiro Sector Social galego e fomento do diálogo civil coas administracións públicas galegas.
- e) Fomentar iniciativas conxuntas entre organizacións de iniciativa social e administracións públicas de formación e difusión de ferramentas sobre: construción discurso, tolerancia e loita contra aporofobia, discurso do odio e desinformación cara calquera colectivo en risco de vulnerabilidade, así como de apoio as súas vítimas.
- f) Facilitar o coñecemento mutuo, a colaboración e a interrelación entre o Terceiro Sector de Acción Social e as universidades mediante a formación, investigación aplicada, voluntariado ou aprendizaxe combinada con servizo.

Dito financiamento destinarase exclusivamente a gastos correntes consumibles non amortizables realizados directamente por EAPN-Galicia e que se recollen no orzamento desagregado de gastos previstos presentado por dita entidade.

No lugar e data da sinatura dixital
O DIRECTOR XERAL DE INCLUSIÓN SOCIAL
Arturo Parrado Puente

